

四庫全書

史部

欽定四庫全書

史部

欽定續文獻通考卷三十八

編修<sub>臣</sub> 翟槐覆勘

總校官內閣中書<sub>臣</sub> 孫溶

欽定四庫全書

欽定續文獻通考卷三十七

選舉考

賢良方正

制科 訪求薦舉附

宋寧宗嘉定五年詔求懷德抱材之士

詔曰方今人才非止一途然山林畝畝之間懷德抱材不求聞達者豈無其人所在監司守臣博加採訪具以名聞毋為文具

八年九月詔舉士人有節行才識學術素為鄉黨推重  
不求聞達者

時以明堂大禮成故有是詔命監司帥臣同加搜訪  
每路一二人仍與本州長吏具從來所為事實所通  
學術連銜保明奏聞三省再加訪察如所舉不妄特  
與擢用

是年三月應賢良方正能直言極諫科何致坐妄造  
事端熒惑衆聽配廣西牢城

理宗寶慶元年正月詔舉賢良

至二年正月召布衣李心傳赴闕授史館校勘賜進士出身寶祐二年正月以饒州布衣饒魯不事科舉一意經學補迪功郎饒州教授景定元年以趙景緯歐陽守道陳大中有靜退之節授景緯秘書郎守道史館校閱大中主管禮兵架閣文字四年四月以婺州布衣何基建寧府布衣徐璣得理學之傳詔各補迪功郎基建婺州教授兼麗澤書院山長璣建寧府

教授兼建安書院山長

嘉熙三年設詞學科

臣僚奏詞科實代王言久不取人日就廢弛蓋試之太嚴故習之者少今欲除博學宏詞從舊三歲一試外更降等立科止試文詞不責記問命題止分兩場引試須有出身人就禮部投狀獻所業如試教官例每一歲附銓闈引試惟取合格不必拘額中選者與堂除教授已係教官資序及京官不願就教授者京

官減磨勘選人循一資他時北門西掖南宮舍人之任則擇文墨超卓者用之其科目則去宏博二字止稱詞學科從之至淳祐初仍罷

景定二年詔禮部國子監以有出身人附銓試場應詞學科如嘉熙三年之制

度宗咸淳二年以太傅陳壽孫言太學增試宏詞科五年詔舉人材

左史陳懋欽薦人才王績翁等三十員

遼聖宗統和十二年十一月詔郡邑貢明經茂材異等之士

道宗清寧二年六月詔宰相舉才能之士

咸雍六年五月設賢良科

應是科者令先以所業十萬言進

十年六月御永安殿策賢良

天祚帝乾統二年閏六月策賢良

金章宗明昌元年三月初設應制及宏詞科



先是上封事者乞鄉以八行貢春官及設制舉宏詞事  
下尚書省集百官議戶部尚書鄧儼等謂成周鄉舉里  
選法卒不可復設科取士各隨其時八行者乃宋人取  
周禮之六行孝友睦婣任恤加之中和為八也凡人之  
行莫大於孝廉今已有取孝廉之法及民有才能德行  
者今縣官薦之犯十惡姦盜者不得應試亦六德六行  
之遺意也夫制舉宏詞蓋天子待非常之士若設此科  
不限進士并選人試之中選擢之臺閣則人自勉矣從

之於是設賢良方正能直言極諫博學宏材達於從政等科試無常期上意欲行即告天下聽内外文武六品以下職官無公私過者從内外五品以上薦於所屬詔試之若草澤士德行為鄉里所服者則從府州薦之凡試則先投所業策論三十道於學士院視其詞理優者委官以羣經子史內出題一日試論三道如可則廷試策一道不拘常務取其無不通貫者優等遷推之宏詞科試詔誥章表露布檄書皆用四六誠諭頌箴銘序記則或依古

今體或叅用四六於每舉賜第後進士及在官六品以下無公私罪者從在外官薦之令試策官出題就考通試四題分二等上等遷兩官次等遷一官臨時取旨授之

三年十月諭尚書省訪求博物多知之士

承安二年三月始定保舉德行才能格

自明昌四年以後郡縣所舉德行才能之士往往賜同進士出身或賜及第而胡光謙則特授將仕郎太

常寺奉禮郎文商則授國子教授特遷登仕郎李獎則給主簿半俸終身無定例焉至是定其格至泰和元年以德行才能非進士科所能盡省臣奏在周禮大司徒以鄉三物教萬民而賓興之所謂萬民農工商賈皆是也前代立賢無方如版築之士鼓刀之叟垂光簡冊者不可勝舉今草澤隱逸才行兼備者宜令謀克及司縣保舉按察司具聞以旌用之時已降令文命復宣旨申之

元世祖中統二年三月命宣撫司官舉文學才識可以從政及茂材異等列名以聞

至元十三年二月詔凡山林隱逸名士所在官司具以名聞

時江南初平故有是詔其後十八年二十八年詔亦如之

元史諤爾根薩里傳曰至元二十一年諤爾根薩里擢左侍儀奉御勸帝治天下必用儒術宜招致

山澤道德之士以備任使帝深嘉納遣使求賢置  
集賢館待之即以諤爾根薩里為集賢館學士凡  
士之應詔者命館穀之飲食供帳車服之盛皆喜  
過望即弗稱旨者亦請加賚遣還有官宣徽者欲  
陰敗其事故盛陳所給廩餼于內前帝過問焉對  
曰此一士之日給也帝怒曰汝欲使朕見而損之  
耶十倍此以待天下士猶恐不至况欲損之誰肯  
來者

二十三年三月遣侍御史程文海訪求江南人材

御史臺臣言近奉旨按察司叅用南人非臣等所知  
宜令侍御史行御史臺事程文海與行臺官博採公  
潔知名之士具以名聞帝命賚詔以往

成宗大德九年詔求山林間有德行文學識治道者  
仁宗延祐元年正月勅各省平章為首者及漢人省臣  
一員專意訪求遺逸先以名聞而後致之

七年十一月

時英宗  
已即位

詔舉才德高邁深明治道之士

詔曰比歲設立科舉以取人才尚慮高尚之士晦迹  
邱園無從可致各處其有隱居行義才德高邁深明  
治道不求聞達者所在官司具姓名行實牒報本道  
廉訪司覆奏察問以備錄用

英宗至治三年正月命搜訪山林隱逸之士

中書平章政事拜住言前集賢侍講學士趙居信直  
學士吳澄皆有德老儒請徵用之帝喜曰卿言適副  
朕心更當搜訪山林隱逸之士遂以居信為翰林學



士承旨澄為學士

秦定帝秦定二年九月遣使宣撫諸道有晦迹邱園才堪輔世者具以名聞

臣等謹按元時用人多由薦舉後雖科舉間行而以徵授官者正未可一二數其辭不就職而屢召不起者杜瑛張特立杜本孫轍何中武恪皆見隱逸傳外又有趙復許謙龍仁夫劉岳申韓性張樞彭炳鄭玉諸人玉以忠義著尤為志節之士

明太祖洪武元年九月詔起懷才抱德隱於巖穴之士  
初帝下金陵辟儒士范祖幹葉儀克婺州召儒士許  
元胡翰等日講經史治道克處州徵耆儒宋濂劉基  
章溢葉琛至建康創禮賢館處之以濂為江南等處  
儒學提舉溢琛為營田僉事基留帷幄預謀議甲辰  
三月勅中書省自今有能上書陳言敷宣治道武畧  
出眾者叅軍及都督府具以名聞或不能文章而識  
見可取許詣闕面陳其事郡縣官年五十以上者雖

練達政事而精力既衰宜令有司選民間俊秀年二十  
十五以上資性明敏有學識才幹者辟赴中書與年  
老者參用之十年以後老者休致而少者已熟於事  
如此則人才不乏而官使得人其下有司宣布此意  
於是州縣歲舉賢才及武勇謀畧通曉天文之士間  
及兼通書律者既而嚴選舉之禁有濫舉者逮治之  
吳元年遣起居注吳林魏觀等以幣帛求遺賢於四  
方至是復下詔曰天下之事天下之賢共理之今賢

士多隱巖穴豈有司失於敦勸歟朝廷疎於禮待歟抑朕寡昧不足致賢將在位者壅蔽使不上達歟不然賢士大夫幼學壯行豈甘沒世而已哉天下甫定朕願與諸儒講明治道有能輔朕濟民者有司禮遣是年徵天下賢才至京授以守令至冬又遣文元吉詹同魏觀吳輔趙壽等分行天下訪求之

六年二月詔有司察舉賢才

自元年詔後三年又諭廷臣曰六部總領天下之務

非學問博洽才德兼美之士不足以居之慮有隱居  
山林或屈在下僚者其令有司悉心推訪至是詔曰  
賢才國之寶也古聖王勞於求賢若高宗之於傳說  
文王之於呂尚彼二君者豈其智不足哉顧皇皇於  
版築鼓刀之徒者蓋賢才不備不足以為治鴻鵠之  
能遠舉者為其有羽翼也蛟龍之能騰躍者為其有  
鱗鬣也人君之能致治者為其有賢人而為之輔也  
山林之士德行文藝可稱者有司采舉備禮遣送到

京朕將任用之以圖至治於是遂罷科舉別令有司  
察舉賢才以德行為本而文藝次之其目曰聰明正  
直曰賢良方正曰孝弟力田曰儒士曰孝廉曰秀才  
曰人才曰耆民皆禮送京師不次擢用其後十二年  
十三年十八年屢詔舉行悉倣此制

十五年五月遣行人訪經明行修之士

八月命徵至秀才分六科試用九月吏部以經明行  
修之士鄭韜等三千七百餘人入見令舉所知復遣

使徵之韜等授布政使參政等官有差時中外大小  
臣工下至倉庫司局諸雜流皆得推舉文學才幹之  
士其被薦而至者又令轉薦以故山林巖穴草茅窮  
居無不獲自達於上由布衣而登大僚者不可勝數  
耆儒鮑恂余詮全思誠張長年輩年九十餘徵至京  
師命為文華殿大學士儒士王本杜敷趙民望吳源  
特置為四輔官兼太子賓客賢良郭有道樂世英徐  
景昇李延中蔣安素薛正言張瑞余應舉馬衛許安

范孟宗何德忠孫仲賢王福王清秀才范敏曾泰稅  
戶人材鄭沂赫從道儒士趙翥張子源張宗德吳顯  
張璣王庶鄭孔麟王德常黃桐生者儒劉堦關賢明  
經張文通阮仲志聰明張大亨金思存等皆立膺顯  
擢其以漸而躋貴仕者又無算也洎科舉復設兩途  
並用亦未嘗畸重輕至建文永樂間薦舉起家有內  
授翰林外授藩司者而楊士奇以處士陳濟以布衣  
遽命為太祖寶錄總裁官其不拘資格類如此



十九年七月詔舉經明行修練達時務之士年七十以下者郡縣禮送京師

諭禮部曰古之老者雖不任以政至於諮詢謀謨則老者閱歷多而見聞廣達於事情周於物理有可資者比來有司不體朕意士有耆年便置不問豈知老成古人所重文王用呂尚而興穆公不聽蹇叔而敗伏生雖老猶足傳經豈可槩以耄而棄之也乃命年六十以上七十以下者置翰林以備顧問四十以上

六十以下者則於六部及布按兩司用之

三十一年十一月

時惠帝已即位

令內外羣臣各舉山林巖穴

懷才抱德及優通文學之士

成祖永樂五年六月勅新城侯張輔等訪求交趾人才

禮遣赴京師

宣宗宣德七年八月敕京官三品以上舉才行文學之士

八年四月詔有司各舉賢良方正一人

至英宗正統元年行在吏部言宣德間嘗詔天下布按二司及府州縣官舉賢良方正各一人迄今尚舉未已宜止之帝以朝廷求賢不可止自今來者六部都察院堂上官考試中者錄用不中者黜之

英宗天順元年四月詔處士中有學貫天人才堪經濟隱居高蹈不求聞達者所司具實奏聞

十月徵江西處士吳與弼至京命為左諭德不受遣行人送歸禮遇特異至憲宗成化十九年廣東舉人

陳獻章被薦授翰林檢討而聽其歸孝宗時浙江儒士潘辰世宗時南直隸生員文徵明永嘉儒士葉幼學皆以薦授翰林院待詔神宗時湖廣舉人瞿九思亦授待詔江西舉人劉元卿授國子監博士江西處士章潢僅遙授順天府訓導而直隸處士陳繼儒四川舉人楊思心等雖皆被薦下之禮部而已

孝宗弘治十年令府州縣正官保舉山林隱逸之士懷才抱德經明行修衆所推服者巡按及布按二司官覆

實奏送吏部量才擢用如所舉不當保勘官並坐

欽定續文獻通考卷三十七

欽定四庫全書

欽定續文獻通考卷三十八

選舉考

孝廉

宋理宗景定元年七月詔舉孝廉

詔曰孝為百行之先廉為四維之一三代以上風俗淳而孝廉之名泯迨漢始詔以此舉士當時二千石不舉孝以不敬論不察廉則免其嚴且重如此我國

家以孝治天下以廉察吏治科雖不常設固有不待  
舉而勸者比年以來澆風汙習瀾倒莫迴朕甚憫焉  
然念良心所蘊誰獨無此特為善者無所勸不善者  
莫之懲表厲之道未至焉爾今嘉與宇內之士同歸  
於善舉孝廉如漢法夫孝廉一本也好貨財則不得  
為孝哇母食則不得為廉以菽水為樂者行必不汙  
以冰蘖自持者親必不辱詔下之日凡吾帥守監司  
令長采公論攷實行各疏其事以名聞朕將尊顯之



以為臣子之勸

金初西北路明安人溫德亨鄂囉補以孝行擢為護衛  
世宗大定十三年四月以有司言授洛州孝子劉政太  
子掌飲丞

章宗明昌三年三月命宰臣錄用孝義之人

時賜棣州孝子劉瑜錦州孝子劉慶祐綰粟旌其門  
間復其身因問宰臣從來孝義之人曾官使者幾何  
左丞完顏守貞以世宗時劉政對且言若輩多淳質

不及事帝曰豈必盡然孝義之人素行已備稍可用  
即當用之後雖有希覬作偽者然偽為孝義猶不失  
為善其檢勘前後所申有可用者具以聞八月有司  
奏寧海州文登縣王震孝行以嘗業進士并試其文  
特賜同進士出身仍注教職一等職任十一月尚書  
省奏益都府舉王樞事親至孝兼博學善書特賜同  
進士出身附王澤榜

元成宗大德九年六月詔孝子順孫堪從政者量才任

之

臣等謹按遼金元俱無孝廉科故遼事全闕金元則僅以舉孝事附載其舉廉自詳舉官門

明太祖洪武六年二月詔舉孝廉及孝弟力田之士

時肅寧劉敏舉孝廉累官至刑部侍郎連山麥至德舉孝弟力田至工部尚書涑水李德成舉洪武十九年孝廉至陝西布政使東陽李希明舉二十九年孝廉至江西叅政權刑部尚書其外又有以孝行旌擢

者洪武中浦江鄭湜擢左參議江寧周琬擢兵科給事中  
中華亭沈德四擢太常贊禮郎又李德擢應天府尹李好誠  
聶士舉擢叅政成祖時金吾右衛總旗張法保掖縣張信武  
寧張仲賢並尚寶丞仁宗時徐州權謹拜文華殿大學士世  
宗時道州楊成章授國子學錄

二十六年九月命舉孝弟敦行者

時以東宮闕官命羣臣舉孝弟敦行者乃徵浦江鄭

氏王氏兩家子弟年三十以上者悉赴京擢鄭濟王  
懃為春坊左右庶子

仁宗洪熙元年八月

時宣宗  
已即位

詔民間有行已廉正才堪

撫字者見任官具實錄舉奏


互見舉  
官門

愍帝崇禎九年詔舉孝廉

吏部言孝廉之舉祖宗朝皆偶一行之未有定制今  
宜通行直省加意物色果有孝廉懷才抱德經明行  
修之士由司道以達巡按覆核疏聞驗試錄用從之

臣等謹按明太祖詔舉孝廉士至京師往往待以不次其縣正官以禮遣孝廉士至京師往往待以不次其後遇國家覃恩海內輒以詔書從事有司以孝行上禮部請旌者歲不下十數人實錄所載莫可殫述而顯擢者槩未之聞矣若夫察廉之令自太祖懲元季之弊重繩貪吏寘之嚴典一時守令畏法率多潔已愛民而朝廷亦必視其治行之殿最為黜陟別詳考課門嘉隆以後資格既重甲科縣令

往往以卓異被徵梯取臺省遂為成例是未可與  
孝廉之制同年而語也



欽定續文獻通考卷三十八



欽定四庫全書

史部

欽定續文獻通考卷

三十九至  
四十四

編修<sub>臣</sub> 翟槐覆勛

總校官內閣中書<sub>臣</sub> 孫溶

欽定四庫全書

欽定續文獻通考卷三十九

選舉考

武舉

宋寧宗慶元中重定武臣闕升格

五年八月立沿邊諸州武舉取士法

先是詔諸路州學置武士齋選官按其武藝至是命  
兩淮京西湖北諸郡倣兵部及四川法於本道安撫

司試武士合格者赴行在解試別立字號分項考校撥十名為解額五名省額

嘉泰二年五月詔諸路帥臣總領監司舉任將帥者與本軍主帥列上之

至四年五月詔諸軍主帥各舉部內將材三人不如所舉者坐之開禧元年七月詔侍從兩省臺諫在外待制學士以上及内外文武官各舉將帥邊守一二入三年十月詔内外軍帥各舉智勇可將帥者二人

嘉定五年十月詔諸路總領官歲舉可為將帥者二  
三人安撫提刑舉可備將材者各二人六年六月詔  
三衙江上諸軍主帥各舉堪為將帥者二三人八年  
正月詔侍從兩省臺諫各舉將材三人十年八月詔  
監司郡守各舉威勇材畧可任將帥者二人

嘉定十年十二月詔武舉人毋復應文舉

理宗寶慶元年八月詔侍從兩省臺諫三衙知閣御帶  
環衛官在外前執政侍從帥臣監司副都統制及屯戍

主將各舉堪充將帥三人

至端平元年正月詔三衙統帥知閣御帶環衛官在外總管軍帥舉堪將帥者各二人嘉熙二年正月詔侍從臺諫卿監郎官帥臣監司前宰執侍從舉曉暢兵機通練財計者各二人三衙諸軍統制舉將材二人四年詔邊塵未靖備禦方嚴必藉人材相與協濟內而侍從臺諫兩省卿監郎官外而監司帥守其舉曉暢兵機練習邊事才畧卓然可用者各二人或陸

沉常調或負累家居著其實狀亟以名聞淳祐元年  
詔以堪充將帥之人有混跡偏裨墮身邊遠無由自  
達者三衙諸衛外閫戎帥各舉三人孰智將孰勇將  
孰能管精銳覈虛實以體國孰能明紀律禁侵暴以  
安民各指實來上以備甄別器使六年詔侍從臺諫  
各舉堪閫寄及餉事者述其才器勞績以聞十二年  
八月詔舉帥材

臣等謹按宋自南渡偏安強隣逼處聞鼓擊而思

將帥之臣其勢盖岌岌矣至寧宗信任姦回橫挑敵釁用兵江淮諸將望風奔潰頻年敗衄疆圉日蹙故寧理之朝舉將選帥之詔無歲不下乃需之甚急而卒未見有能司閫外之寄為國家長城者衛溼所謂蓄養無素而取其臨時之過也

紹定元年命武舉進士避親及所舉之人止避本廳令無妨嫌官引試若合格則朝廷別遣官覆試

七年詔從軍應賞者第補右選以清流品

自建炎兵興雜沅補授者衆有曰上書獻策曰勤王  
曰守禦曰捕盜曰奉使其名不一皆閫帥假便宜承  
制之權以擅除擢有進士徑補京官者有素身冒名  
即為郎大夫者至是以有礙銓法故有是詔

詔民間願習射者籍其姓名守令月一試取藝優者如  
三路保甲法區用

端平二年六月御幄殿閱武舉進士射

後淳祐四年開慶元年並行之



淳祐九年以北兵屢至命極邊次邊一體收試仍量增解額五名省額二名

是歲武舉正奏名王時發係軍人見充殿前司左軍統領既登第換授特命就本職上予帶同字以示優獎

度宗咸淳六年命禮部於武舉進士平等者每百人內取放待補一人絕倫者每百人內取待補十三人

恭帝德祐元年十一月命諸制司各舉才堪將帥者十

人不限偏裨士卒如不隸軍中者許投匱自薦

遼聖宗統和三年八月北皮室詳袞進勇敢七人

十二年十一月詔諸道軍有勇健者具以名聞

金熙宗皇統八年定軍功遷除格

金制武散官謂之右職以軍功為優凡軍功有六一

曰川野見陣最出當先殺退敵軍二曰攻打抗拒州

縣山寨奪得敵樓三曰爭取船橋越險先登四曰遠

探捕得喉舌五曰險難之間遠處報事情成功六曰

謀事得濟越衆立功至是定制凡帶官一命昭信校尉以上者初除主簿及諸司副使二主簿及諸司使三下令四中令五上令或通注鎮軍都指揮使及正將其官不至昭信及無官者自初至三任通注丞簿四下令五中令六上令及知城寨大定二十九年詔遷至鎮國者取旨升除女直人昭信校尉以上者初下簿二下令三中令四五上令女直一命遷至昭信校尉餘人至昭信以上者初下簿二中簿三下令五

六上令凡至宣武將軍以上者初下令二中令三四上令自餘勞効等皆各有定格焉

章宗泰和元年定試武舉之制

自皇統時始設武舉至帝承安四年十一月詔許諸色人就試至是定上中下三等能挽一石力弓以重七錢竹箭百五十步立貼十箭內府試欲中一箭省試中二箭程試中三箭又遠射二百二十步垛三箭內一箭至者又百五十步內每五十步設高五寸長

八寸卧鹿二能以七斗弓二大鑿頭鐵箭馳射府試  
則許射四反省射三反程試二反皆能中二箭者又  
百五十步內每三十步左右措置高三尺木偶人戴  
五寸方板者四以槍馳刺府試則許馳三反省試二  
反程試一反左右各刺落一板者又依廢例問律一  
條又問孫吳書十條能說五者為上等凡程試若一  
有不中者皆黜之若射貼弓八斗遠射二百一十步  
射鹿弓六斗孫吳書十條通四為中等射貼弓七斗

遠射二百五步射鹿弓五斗孫吳書十條通三為下等解律刻板皆欲同前凡不知書者雖上等為中中則為下凡試中中下願再試者聽二年省臣奏試武舉當與進士同時今年八月府試欲隨路設考試所臨期差官恐以瓶立未見應試人數遂權令各處就考之

三年定武舉出職遷授格

承安元年定第一名初都巡副將二下令三中令四

五上令第二第三名初巡尉部將二上簿三下令四  
中令五六上令餘人初副巡軍轄二中簿三下令四  
中令五六上令至是復定上甲第一名遷忠勇校尉  
第二第三名遷忠翊校尉中等遷修武校尉收充親  
軍不拘有無廕視舊格減一百月出職下等遷敦武  
校尉亦收充親軍減五十月出職

六年九月詔行尚書省選才畧出衆武藝絕倫之士

宣宗貞祐三年賜武舉勅命章服同進士例

又詔隨處武舉入試者自非見居職任及已用于軍前者令郡縣盡遣詣京師別為一軍以備緩急其被薦而未授官者亦量材任之

四年閏七月命掌軍官舉奇才絕力之人提控都副統等官互舉其屬頒舉官賞罰格許功過相除品官及草澤人有才武者舉薦升降亦如之

興定二年四月特賜武舉溫特赫耀珠以下百四十人及第



元光二年東京帥臣請盡括武舉為長校不允

東京總帥赫舍哩約赫德言武舉入仕皆授巡尉軍  
轄此曹雖善騎射不歷行陣不知軍旅一旦臨敵恐  
致敗事乞盡括付軍前為長校俟有功則升之宰臣  
奏國家設此科與進士等而欲盡寘軍中非弊進人  
材之道遂籍丁憂待闕去職者付之

元世祖至元二十年二月定軍官選格

舊制萬戶千戶百戶父子相繼管領原軍不設蒙古

軍官至是分上中下三等定立條格通行遷轉以三年為滿理算資考升加品級若年老病故者令其子弟依例廕叙後各翼大小俱設蒙古軍官又以調遣征進俱已離翼難與民官一體遷轉廕叙遂定萬戶千戶鎮撫自奏准日為始以三年為滿通行遷轉百戶以下不拘此例其餘軍府等官各定制有差

順帝至正十五年二月詔富民願出丁壯義兵五千名者為萬戶五百名為千戶一百名為百戶仍降宣勅牌面

臣等謹按元代不設武舉專事承襲時馬祖常議將家子弟驕脆有孤任使而庶民有挽張蹶張老死草野者當建武學武舉儲材以備非常時雖不用識者韙之

明太祖洪武二十年從禮部請立武學用武舉其武臣子弟令於各直省應試

初武職率以勲舊帝慮其不率以武士訓戒錄大誥武臣錄頒之至是乃參用將材三歲武舉六歲會舉

每歲薦舉皆兵部武選司掌之內而五府留守司外而各都司各衛所及三宣六慰流官八等都督及同知僉事都指揮使同知僉事正副留守世官九等指揮使及同知僉事衛所鎮撫正副千戶百戶試百戶直省都指揮使二十一留守司二衛九十一守禦屯田羣牧千戶所二百十有一及苗蠻土司皆聽部選凡大選曰色目曰狀貌曰才行曰封贈曰襲蔭其途有四曰世職曰武舉曰行伍曰納級

英宗正統十年正月詔舉智勇之士

天順八年詔天下文武官舉通曉兵法謀畧出衆者

各省撫按三司直隸巡按御史考試中式者兵部同  
總兵官於帥府試策畧教塲試弓馬騎中四矢步中  
二矢以上者為中式騎步所中半者次之

憲宗成化十四年詔武科鄉會試悉視文科例

邱濬大學衍義補曰臣按開武舉以試將才亦猶  
設文科以取儒士也科目以試士得其文而未必

得其行然因言以求其心究其學識亦可彷彿其  
一二焉武科之於將才何莫不然宋太宗謂科目  
進士不敢望拔十得五得一二人足矣臣於武舉  
亦云

孝宗弘治六年定武舉六歲一行先策畧後弓馬策不  
中者不許騎射

大學衍義補曰臣按武事與文藝異固不可以言  
語文字求也然於無事之時欲求戰陣軍旅之士

不以言語文字求之又不可得也大抵求士以資  
世用貴乎得識義理知機變之人無間文武皆然  
也試之以武舉欲其知威武戰爭之意耳彼誠識  
義理知機變一旦臨事料敵出奇應變舉諸此而  
措之耳論文科者謂科目不足以得人豪傑之士  
由是而出耳武舉亦然

臣等謹按以武設科所以備軍旅之司騎射其本  
業也宋仁宗親試武舉先閱其騎射而後試之可

謂知所重矣慶歷六年始詔以策為去留弓馬為高下蓋猶兼之也若弘治此制策不中者至不許騎射則是專以答策為主置其所當重而重其所可輕於設科之意何居焉

十七年改定武舉三年一試

武宗正德三年正月兵部議上武舉條格從之

每遇文舉鄉試之年預行兩京十三布政司有能究極韜畧精通武藝者俱報所在官司軍衛送都司有



司送布政司從撫按同三司考試無三司者從撫按  
考試兩京亦送巡按考試中式者次年四月會試兵  
部初九日第一場較騎射人發九矢中三矢以上者  
為合式十二日二場較步射亦發九矢中一矢以上  
者為合式俱於京營將臺前較閱十五日三場試策  
二道論一道於文場試之試卷皆彌封謄錄編號上  
書馬步箭若干送入內簾看詳分配等第其答策洞  
識韜畧作論精通義理參以弓馬俱優者列為上等

策論頗優而弓馬稍次者列於中等之前弓馬頗優而策論麤知兵法直說事狀文藻不及者列於中等之後其或策論雖優而弓馬不及或弓馬偏長而策論不通俱黜之以俟後舉及期若遇風雨騎射不便則移期事竣仍張榜於兵部門外次日引見畢賜宴中府名曰會武其中式作論一道答策二道馬上中四箭以上步下中二箭以上者官員加署職二級第  
一人若係百戶以上官照例加升百戶以下特授千

戶職銜送團營贊畫以示崇異第二名以下總旗授以試百戶小旗生員舍人授以試所鎮撫軍民授以各衛試知事俱月支米三石作論一道答策二道馬上中三箭以下步下中一箭以上者官員量加署職一級總旗授以署百戶小旗舍人授以署冠帶總旗生員授以試知事軍民授以試巡檢俱月支米二石通送京營總兵官處量用有願回籍者咨撫巡官依秩委用十四年復定初場馬上箭以三十五步為則

二場步下箭以八十步為則三場策一道

世宗嘉靖元年定武舉鄉會試期及考官員數

各省應武舉者巡按御史於十月考試兩京武學於  
兵部選取俱送兵部次年四月會試翰林二員為考  
試官給事中部曹四員為同考鄉會場期俱以月之  
初九日為第一場又三日二場又三日三場其制大  
率倣文闈而減殺之後旋罷旋復又倣文闈南北卷例  
分邊方腹裡每十名邊六腹四以為常

神宗萬曆十五年以武職選用紛雜詔嚴加察核

世宗嘉靖中詹事霍韜極言軍職冗濫之弊命給事中夏言等查覈裁汰以數千計至是復詔嚴加察核且命提鎮科道會同兵部品年資課技藝序薦剡分為三等名曰公選

十八年七月命廷臣舉將材

三十八年定武會試進士額以百名為率

其後科臣又請特設將材武科初場試馬步箭及鎗

刀劍戟拳搏擊刺等技二場試營陣地雷火藥戰車等項三場各就其兵法天文地理所熟知者言之報可而未行

愍帝崇禎四年始舉行武殿試

時武會試榜發論者大譁帝命中允方逢年倪元璐再試取翁英等百二十人逢年元璐以時方需才請殿試傳臚悉如文例乃賜王來聘等及第出身有差武舉殿試自此始

十四年特開奇謀異勇科詔下無應者

十五年十一月詔舉堪督師大將者

欽定續文獻通考卷三十九

欽定四庫全書

欽定續文獻通考卷四十

選舉考

任子

宋寧宗嘉定十四年四月命任子簾試於御史臺

次年二月罷簾試

理宗端平元年詔省吏官至朝奉中散中奉大夫者存  
致任子不得過二三人密院比類一體施行令有司裁



抑參著為令

淳祐二年詔臣僚世賞不許奏異姓著為令

寶祐四年十一月詔開國以來勲臣之裔有能世濟其美而不世其祿者所在州郡以聞

遼太宗天顯二年十二月詔選遙輦氏九帳子弟可任  
官者

臣等謹按葉隆禮契丹國之言契丹任子之法文武同奏廕亦有員數然其制莫可詳矣

穆宗應歷五年四月命郎君蕭海瓌世為北府宰相

時蕭護思為北院樞密使命世預宰相選辭曰臣子孫賢否未知得一客者使足矣從之

景宗保寧元年三月以蕭思溫為北院樞密使兼北府宰相仍命世預其選

聖宗統和元年九月以故于越屋只有輔導功錄其子孫

五年耶律諧理伐宋獲其將康保威詔世預節度使選

九年六月詔有沒于王事者官其子孫

太平八年十一月詔庶孽雖已為良不得與世選

興宗重熙十六年二月詔世選之官從各部耆舊擇材  
能者用之

道宗清寧二年正月詔二女古部與世預宰相節度使  
之選者免皮室軍

金海陵貞元二年定廕叙法

熙宗天眷中門廕之制凡一品至八品皆不限所廕

之人至是定一品至七品各限以數削八品用廢之制

世宗大定二年二月定世襲明安穆昆遷授格

至十七年四月詔世襲明安穆昆若出任者雖年未六十欲令子孫襲者聽又以明安穆昆皆國家勤勞有功之人其世襲官不宜以小罪奪免十月制諸明安父任別職子湏年二十五以上方許承襲章宗承安五年又定明安穆昆軍前怠慢及鬪毆殺人遇赦

免死罷世襲制

金史完顏宗憲傳曰世宗時有司言諸路明安穆  
昆怙其世襲多擾民請同流官以三十月為考詔  
下尚書省議宗憲為平章政事上議曰昔太祖皇  
帝撫定天下誓封功臣襲明安穆昆今若改為遷  
調非太祖約臣謂凡明安穆昆當明核善惡進賢  
退不肖有不職者其弟姪中更擇賢者代之帝從  
其議

又完顏宗尹傳曰大定中宗尹為平章政事乞令  
子尼楚赫襲具明安會太尉守道亦乞合其子神  
果努襲其穆昆凡承襲人不識女直字者勒令習  
學世宗曰此二子吾識其一習漢字未習女直字  
自今女直契丹漢字曾學其一者即許承廕遂著  
于令

四年五月詔皇家袒免以上就廕者依格引試中選者  
勿令當倖使

五年十月制亡宋官當廕子孫者並同亡遼官例

詔教坊出身人若任流內職者與文武同用廕自餘有  
勤勞者賞賜而已不得典城牧民

臣等謹按世宗此詔蓋有鑒於海陵而發然教坊  
賤役而使之任流內職且同文武用廕視去正隆  
時亦五十步百步之間耳

更定冒廕及取廕者罪賞格

七年五月命司天臺官四品以上改授文武資者並聽





時文始于將仕武始于進義以上至七品儒林忠顯各七階許廕一人至六品承直昭信計九階許廕二人自大定十四年文武官下各增二階其七品視舊為九階亦廕一人至五品凡十七階方廕二人其五品至三品並無間越惟六品不用廕乞依舊格五品以上增廕一人六品廕二人七品仍舊制從之

時又以舊格雖有已子許廕兄弟姪而新格禁之非所以崇孝弟也遂聽讓廕

承安五年五月定承廕人試弓箭格

泰和元年正月以大府監孫復言門廕太濫更定廕叙法頒行之

至二年定制凡諸色出身文武官一品廕子孫至曾孫及弟兄姪孫六人因門廕則五人二品則子孫至曾孫及弟兄姪五人因門廕則四人三品子孫兄弟姪四人因門廕則三人四品五品三人因門廕則二人六品二人七品一人因門廕則六品七品皆一人

凡進納官正班三品廕四人雜班三人正班武略子  
孫兄弟二人雜班明威一人懷遠以上二人鎮國以  
上三人又舊制司天太醫內侍長行雖至四品非特  
恩換授文武官資不許用廕以本人見充承廕難使  
係班故也是年定司天太醫遷至四品換文武官者  
廕一人年六十以上退與患疾身故者雖非文武官  
資除存習本業外亦聽廕一人止一子者則不須習  
即廕

七年九月詔應廕之家旁正廕足其正廕者未出官而  
亡許補廕一人

宣宗貞祐二年四月詔有司具陣亡人子孫以備錄用  
興定二年十一月定經兵州縣職官子孫非本貫理廕  
及過期不廕等格

元光元年五月詔陣亡把軍品官子孫十五以上者依  
品官子孫例隨局承應十五以下十歲以上者依品從  
隨局給俸至成人本局差使

哀宗正大五年二月詔書死節子孫於御屏量材官使之

臣等謹按哀宗詔有司為死節士立褒忠廟又書其子孫於御屏以備擢用七年又詔賜陝西死事之孤鹽引及絹仍量材任使雖其時迫於危亡以是為激勵人心之計要之國家勸忠之典恆必由之未可以亡國少之也

元世祖中統三年十二月詔諸路管民總管子弟有分

管州府司縣及鷹坊人匠諸事者罷之

至元四年詔諸品官正從分等職官用廕各止一人

凡諸廕官無論去任致仕身故其承廕人年及二十  
五以上者聽凡廕以嫡長子若有廢疾立嫡長子之  
子孫曾元如無則立嫡長子同母弟及其子孫曾元  
如無則立繼室所生如無則立次室所生如無則立  
婢子絕嗣者旁廕其親兄弟各及子孫如無則旁廕  
伯叔及其子孫諸用廕者孫降子曾孫降孫婢生子

及旁廕者皆於合叙品級降一等其廕子入品職者各循其資考流升轉遷自九品依例遷至三品止於本等流轉二品以上選自特旨諸職官廕子之後若有餘子不得於諸官府自求職事

五年定品官子孫倖直銓叙法

三品至七品廕叙人員年二十五以上者當倖使一年並不支俸滿日三品至五品子孫量材叙用六品七品子准上銓注監當差使成宗大德九年二月支

詔致仕官止有一子應承襲者免俸使武宗至大四年詔職官子孫承廕試一經一史能通大義者免俸使不通者遣還習學蒙古色目願試者聽仍量進一階

七年四月定達魯噶齊子弟承廕之制

諸路達魯噶齊子弟廕充散府諸州達魯噶齊其散府諸州子弟充諸縣達魯噶齊其諸縣子弟充巡檢至成宗大德四年以上都虎賁司及武衛內諸達魯



噶齊亡歿無承襲之例似為偏員令察其子孫能者  
以聞

十五年五月定軍官襲替等次

凡主兵官有功升擢其舊職宜別授有功者若陣亡  
許以其子弟承襲十七年詔渡江總把百戶有功升  
遷者總把依千戶降等承襲百戶無可降許從本等  
十九年詔元帥招討使子孫襲為萬戶總管子孫為  
千戶總把子孫為百戶給元佩金銀符管其元軍陣

亡者仍以本等承襲二十四年詔凡舊臣勲伐及有  
戰功者其子弟當先試以小職若果才能則大用之  
二十五年定制軍官陣亡者其子弟許本等承襲如  
無能勿授病故者降二等其子弟果能仍於本等用  
之二十七年又制民官陣亡與軍官一體承襲軍官  
襲父職民官子視父職降二等其孫若弟復降一等  
成宗大德十一年詔色目鎮撫已歿而子幼擇其兄  
弟之子有能者依例暫襲俟其子長即以職還之

成宗大德四年定諸職官廕叙之制

正一品子則正五品從一品子則從五品正二品子則正六品從二品子則從六品正三品子則正七品從三品子則從七品正四品子則正八品從四品子則從八品正五品子則正九品從五品子則從九品正六品子流官於巡檢內用雜職於省劄錢穀官內用從六品子近上錢穀官正七品子酌中錢穀官從七品子近下錢穀官諸色目人視漢人優一等達魯

嚙齋子孫與民官同旁廕依例降等

陶安曰有虞世賞岐周世祿而不世官者人賢否殊也逮至周官以禮樂德行掌國子之教然猶考藝進退未嘗悉世其官而必任焉後世廕補法行或曰顯官必公卿子弟為之以幼習其業熟朝廷臺閣之儀或曰驕驚不通古今無益於民宜明選求賢除任子之令是皆偏見耳及考漢制二千石以上得任子弟擇茂廉者補令丞其法良而未備

今制廕補五品以上受命於朝降自六品省銓掌金  
穀且第其上中下以歲月為差至滿始受朝命許  
典民政蓋治民者為國之大端理財者經國之  
要務將俾因任知學練世故涉艱難以培其才然  
後移以治民故不得不自理財始此則古所無也  
武宗至大四年閏七月定軍官子弟二十歲始承襲  
仁宗延祐六年定福建等處承廕人叙用之地

福建兩廣八番以江南廕叙海北海南左右兩江則

接連廕叙雲南則以四川四川甘肅則以陝西

五月命致仕官一子承廕者驗其品格先為銓注俾以  
資奉月養榮其親

七年七月

時英宗  
已即位

罷陰陽醫匠人承廕

次年三月又申是令其藝果精絕者擇用之

明太祖洪武二十六年定廕叙之制

文官自正從一品至正七品子孫許廕一人其廕由  
正從五品以至流外之上中下三等以次遞降大槩

與元制同而旁廕降等及試補之法亦略如之武官  
爵止六品其職死者襲老疾者替世久而絕以旁支  
繼凡襲職子弟年二十者比試初試不中受職署事  
食半俸二年再試中者食全俸仍不中者謫為軍成  
祖永樂以後其襲替之制又稍更焉

臣等謹按明初因前代任子之制文官一品至七  
品皆得廕一子以世其祿後乃漸為限制在京三  
品以上滿考著績方得請廕遇國家有大典禮如

登極奉徽號冊后建儲併皇子生屢有加恩亦率  
皆勲戚及政府大臣得之而陣亡克敵及卒於王  
事者或以功廢或以難廢例皆錄用其子孫此則  
終明之世不變者也至武宗正德五年以寧夏山  
東河南賊平大學士李東陽楊廷和劉忠梁儲等  
各皆晉秩廕子是時內臣欲大有封殖而以是餌  
閣臣蓋自是邊功亦推恩矣故世宗嘉靖間輔臣  
以贊元功往往藉拒虜之功厚加世賞即方士亦



與恩賚馬至於內臣受廕始於英宗時王振廕其從子山林並都督指揮而曹吉祥嗣子欽至封昭武伯自此貂璫子弟遂濫膺勲爵矣嘉靖二年以從龍功廕太監趙山養子雲為錦衣指揮厥後太監楊璉邱清戴義等皆援例以請而張欽養子李賢廕為錦衣指揮且命以世襲廷臣爭之不能得神宗萬曆十年以皇第一子生司禮監馮保廕弟姪都督僉事意猶未慊其黨張宏孫隆張鯨何進

李祐張朝輩亦皆得廢迄熹宗朝逆奄肆焰魏容  
兩家雖襁褓之子無不拖朱曳紫其謬恩冗濫亂  
政槩不足述也

惠帝建文元年六月詔錄故湖廣行省參政吳雲子黼  
為國子生

以雲死事雲南故也先是太祖洪武初設立太學取  
文武一品至七品子充其中亦間有及於七品之下  
者蓋世祿之義已具於此矣至帝復有是詔自後凡

欽定四庫全書

欽定四庫全書

卷四十一

十四

死難禦敵陣亡及沒於王事不問其官品外內皆得  
廕遂為永制而經筵進講儲闈輔導考滿及効績勤  
勞各皆有廕子入監之例宣宗時臣僚時有乞令其  
子入監讀書者帝驗其材質試其文理之可教者許  
之英宗天順元年從禮部議在京三品以上之子奏  
願入監讀書者務令從科目出身不許歷事憲宗成  
化初詔大臣三品以上子孫許送三人入監依監例  
出身隨又令官非年久有聲績者不許十八年又詔

京官三品以上政績顯著者廕一子入監仍先試能  
通本經四書大義者乃許孝宗弘治十年定制京官  
三品以上已經考滿給誥命者許一子免考送監如  
未及一考并劾退及年遠者或雜流出身者俱不許  
武宗正德元年詔東宮講讀舊臣子孫乞恩廕叙者  
備查祖父年勞已及三年於中書舍人內習字出身  
未及三年送國子監讀書八年詔東宮侍班官三年  
廕一子入監讀書十六年世宗即位詔凡文武官死

於忠諫者廕一子入監讀書嘉靖三十年詔大臣應  
廕子送監而未有子者以親弟改廕神宗萬曆十二  
年詔三品官日講年久開陳有勞者雖未考滿許廕  
一子入監讀書

臣等謹按太祖取品官子孫充國子生蓋倣古太  
學之教非廕也廕子入監實自惠帝錄吳黼始後  
代遞加推廣而賞延之澤彌宏矣

孝宗弘治十年詔廕子未仕亡歿許其補廕若應得廕

子恩而身故許其子孫自陳其有子而願廢其兄弟子者聽

至武宗正德八年定制補廢只許一人已補而又故者毋得再補穆宗隆慶五年詔凡以廢入監後中科目者仍令補廢一人神宗萬曆十一年詔凡廢子未仕而故年遠親盡者毋得補廢

臣等謹按舊制凡嫡長子孫先由錄廢國子生後以軍功改授錦衣衛千百戶者許以嫡次子孫補

廕蓋明時文武二廕文廕如國子生中書舍人尚  
寶丞光祿丞通政知事大理評事之類大抵文臣  
三品以上子孫為之武廕則勲戚之家與閫帥及  
文臣有軍功者其廕如錦衣各衛千百戶指揮僉  
事同知及都督指揮僉事之類或世襲或一世二  
世皆酌其功之大小取旨裁定無常制焉至尚書  
朱濬子紹祖之授通政司參議祭酒宋訥子復祖  
之授國子司業大學士胡廣子種尚書金忠子達

之授翰林檢討尚書呂震子熊劉儁子奎陳洽子  
樞侍郎儀智子銘銘子泰俞山子誥之授給事中  
及儀銘復以給事中改檢討金達復以檢討改給  
事中皆特旨非廢典也



欽定續文獻通考卷四十

欽定四庫全書

欽定續文獻通考卷四十一

選舉考

童科

宋度宗咸淳二年七月禮部侍郎李伯玉言人材貴乎善養不貴速成請罷童子科息奔競以保幼穉良心詔自咸淳三年為始罷之

自寧宗嘉定十四年定童子科歲取三人之制至是

罷仍詔須卓絕能文者許諸郡薦舉

金熙宗天眷二年詔設童子科

凡士庶子年十三以下能誦二大經三小經又誦論語諸子五千字以上府試十五題通十三以上會試每場十五題三場共通四十一以上為中選所貴在幼而誦多者若年同則以誦大經多者為最

海陵天德時以童子科無益詔罷之

世宗大定二十九年七月

時章宗已即位

復設經童科

章宗明昌三年平章政事完顏守貞請約取經童從之  
守貞言經童之科非古也自唐諸道表薦或取五人  
或十人近代宋仁宗以為無補罷之本朝皇統間取  
及五十人因以為常天德時復廢今復置取輒以百  
數恐久積多不勝銓擬乞約取之帝曰若所誦皆及  
格如何守貞曰視最幼而誦不訛者精選之則數亦  
不多也復問參知政事胥持國對曰所誦通否易見  
豈容有濫帝曰限以三十或四十人若百人皆通亦

可復取其精者持國曰是科蓋資教之術耳夫幼習  
其文長玩其義使之蒞政人才出焉如中選者加之  
修習進士舉業則所記皆得為用臣謂可勿令遽登  
仕途必習舉業而後官之若能擢進士第自同進士  
任用如中府薦會試視其次數優其等級幾舉不得  
薦者從本科出身似可以激勸而得人矣詔議行之  
五年定經童遷轉格

神童三次終場同進士恩榜遷轉兩次終場全免差

使第六任與縣令依本格遷官如一次終場初入仕  
則一除一差其餘並依本門戶仍使應三舉然後入  
仕每舉放四十人

先是以童子舉者太宗天會八年東平劉天驥七歲  
能誦詩書易禮春秋左氏傳及論語孟子命教養之  
時尚未有選舉之制至帝明昌元年益都府申童子  
劉住兒年十一歲能詩賦誦大小六經所書行草頗  
有法孝行夙成乞依宋童子李淑賜出身且加以恩

詔帝召至內殿試鳳凰來儀賦魚在藻詩又令賦早  
詩嘉之賜本科出身給錢粟官舍令肄業太學又有  
張元素易州人八歲試童子舉蓋尤童子中之出類  
者也

元成宗大德三年始舉童子科

時舉童子楊山童海童五年大都提舉學校所舉安  
西路張秦山江浙行省舉張昇甫武宗至大元年舉  
武福安仁宗延祐三年江浙行省舉俞傳孫馮恬哥

六年河南路舉張答罕學士完者不花舉丁禎禎七  
年河間縣舉杜山童大興縣舉陳昉英宗至治元年  
福州路連江縣舉陳元麟三年河南行省舉張英泰  
定帝泰定四年福州舉葉留畊文宗天曆二年舉杜  
夙靈至順二年制舉答不歹子買來的皆以其天資  
穎悟超出兒輩或能默誦經文書寫大字或能綴緝  
辭章講說經史並令入國子學教育之惟張泰山尤  
精篆籀陳元麟能通性理葉留畊問以四書大義則



對曰無過事父母能竭其力事君能致其身時人以遠大期之又袁遵道豐縣人年六歲能誦五經以神童薦安滔九歲以經童登第陰幼過奉新人八歲中

經科

明科目之制不設童科間有以神童薦者召至親試或留中講讀或遣歸就舉其後多由進士致位通顯而以功業自表見卓然為當世名臣者蓋不乏人

成祖永樂四年瑞安黃養正年十一能作大字令人

監讀書給與廩饌景帝時茶陵李東陽以成籍居京師四歲能作徑尺書帝召試之大喜抱置膝上賜果鈔後兩召講尚書大義稱旨命入京學英宗天順初休寧程敏政十歲隨父信官四川巡撫羅綺以神童薦召試聖節及瑞雪詩并經義各一篇援筆立就詔讀書翰林院官給廩給憲宗成化初安寧楊一清十歲有司以竒童薦為翰林秀才命內閣擇師教之壽光劉欽八歲亦召見愛其聰敏且拜起如禮即命為

中書舍人宮殿門闕高一清時同官常提之出入帝  
慮牙牌易損命易以銀孝宗弘治中會稽董玘舉奇  
童試不中格罷歸又洪鐘四歲以善大書舉入翰林  
肄業任道遜以奇童舉侍東宮書朱奎林章謝宇並  
以幼童舉直內閣

欽定續文獻通考卷四十一

欽定四庫全書

欽定續文獻通考卷四十二

選舉考

方伎

宋寧宗嘉定四年詔太史局生必俟試中方得轉補

臣等謹按自大觀四年以算學士歸之太史局淳

熙元年春聚局生子弟試歷算崇天宣明太衍

三經取其通習者五年以紀元歷試九年以統元

歷試十四年定以崇天紀元統元歷三歲一試此  
南宋試太史局生之法也

理宗淳祐十二年復太史局試秘書省制

秘書省言舊典以太史局隸秘書省今引試局生不  
經秘書非也稽之於令諸局官應試歷算天文三式  
官每歲附試通等則以精熟為上精熟等則以習他  
書多為上習書等則以占事有驗為上諸局生補及  
二年以上者並許就試一年試歷算一科一年試天

文三式兩科每科取一人諸同知算造官闕有試翰  
林天文官闕有試諸靈臺郎有應試補直長者諸正  
名學生有試問景祐新書者諸判局闕而令差諸秤  
漏官五年而轉資者無不屬於秘書而局官等人各  
置脚色遇有差遣改補功過之類並申秘書今乃一  
切自行陳請殊乖初意自今有違令補差及不經秘  
書公試補中者中書執奏改正仍從舊制申嚴試法  
從之

初高宗紹興中復置醫學以醫師主之翰林局醫生并奏試人並試經義一十二道取六通為合格孝宗乾道三年罷局而存御醫諸科後更不置局而存留醫學科令每舉附省闈別試所解發太常寺掌行其事淳熙十五年命內外白身醫士經禮部先附銓闈試脉義一場三道取其二通者赴次年省試經義三場一十一道以五通為合格五取其一補醫生俟再赴省試升補八通翰林醫學六通祇候其特補薦補

並停光宗紹熙二年復置太醫局銓試依舊格其省  
試三場以第一場定去留墨義大義等題倣此

金制凡司天臺學士女直二十六人漢人五十人聽官  
民家年十五以上三十以下試補又三年一次選草澤  
人補充其試以宣明歷試推步婚書地理新書試合婚  
安葬并易筮法六壬課三命五星之術

哀宗正大初有臨渙人武禎善占天文徵至京除司  
天臺管勾及至蔡州禎子亢又以右丞完顏仲德薦



授司天長行

凡醫學十科大興府學生三十人餘京府二十人散府節鎮十六人防禦州十人每月試疑難以所對優劣加懲勸三年一次試諸太醫雖不係學生亦聽試補

世宗大定十五年泰安人紀天錫上其所著醫書授醫學博士

元世祖中統二年五月詔立醫學

遣太醫院副使王安仁授以金牌往諸路設立醫學

其生員擬免本身檢醫差占等役俟其學有所成每  
月試以疑難視其所對優劣量加勸懲後又定醫學  
之制設諸路提舉綱維之其隨路學校每歲出降十  
三科疑難題目呈太醫院下諸路醫學令生員依  
式習課年終置簿解送本司定其優劣

至元十三年正月詔凡儒學卜筮及通曉天文歷數之  
士所在官司具以名聞

先是有趙城人田忠良精陰陽術用太保劉秉忠薦

召侍左右又帝嘗命秉忠選太史官屬授大名人靳德進天文星歷卜筮三科管勾至是以江南平有是詔十五年湘潭人張康至授著作佐郎至十六年二月又遣使訪求通皇極數鄱陽祝泌子孫七月遣牙牙納木崔或至江南訪求術藝之士二十六年七月復遣牙牙僧住詣江南搜訪之忠良贈至趙國公諡忠獻德進至魏國公諡文穆

十四年八月定管匠官止於匠官內流轉

元官制分內外任外任中又分民職軍職匠職等名匠職官甚多與軍民職官相等亦謂之局院官是年定是制

時有渾源人孫成善為甲贈至神川郡公諡忠惠子拱世其業亦贈至神川郡公諡文莊回回人阿喇卜丹以善製砲世襲副萬戶回回人伊斯瑪音亦以善製砲世襲職波羅國人阿爾尼格尼以善粧塑贈至太師涼國公諡敏惠劉元繼之亦官至昭文館大學

士

二十二年四月定選試太醫法

每三年一次選試先於八月內隨各路總管府試十

三科經論至明年二月赴大都省試中選者注定名

闕間奏充太醫承應其府試中選人充各路學官至

武宗至大四年閏七月仁宗即位禁醫人非選試及

著籍者毋行醫學

郭微緇素錄曰十三科者大方脈雜醫科小方脈

科風科產科眼科口齒兼咽喉科正兼金瘡骨科  
瘡種科鍼灸科祝由書禁科其法考較醫經辨驗  
藥味合試經書則素問難經聖濟錄本草千金翼  
方也元惟重其選故名醫特多

二十七年五月括天下陰陽戶口仍立各路教官有精  
於藝者令各歲貢一人

二十八年六月始置諸路陰陽學

其腹裏江南若有通曉陰陽之人各路官司詳加取

勘每路設教授以訓誨之有術藝精通者每歲錄呈  
省府赴都試驗果有異能則於司天臺內許令近侍  
仁宗延祐初令凡陰陽人皆教授官管轄之而上屬  
於太史

臣等謹按元典章試陰陽人皆三元經書內出題  
有占算三命五星周易六壬數學等書婚元則占  
才大義書宅元則周書祕奧八宅通真論瑩元則  
地理新書瑩元總論地理明真論所分科目大約

亦以此定元貞元年二月定其制

武宗至大元年二月詔諸內侍太醫陰陽樂人毋授常  
選散官

至順帝至正中有以音樂得幸者帝命為崇文監丞  
叅政朶兒直班他擬一人以進帝怒曰選法盡由中  
書耶朶兒直班頓首曰用幸人居清選恐後世議陛  
下今選他人臣實有罪帝悅而從之

明制天文生用世業子弟選補又命府州縣舉陰陽人



補正術等官

明初置太史監後改欽天監掌歷數天文地理之事  
凡習業者分四科自五官正以下與天文生陰陽人  
各專一科凡天文生有缺初令天下訪取仍會禮部  
考驗收用後止選世業子弟立師教習有成遇缺選  
補其教師亦量升授孝宗弘治十一年命訪世業原  
籍子孫并山林隱逸之士及致仕退閒官吏監生生  
員軍民人等有能精通天文歷數陰陽地理五星子

平遁甲大定并六壬占課灼龜等術者每府不過一  
二人試中取用凡天下府州縣舉到陰陽人堪任正  
術等官者俱從吏部送本監考中咨回選用不中者  
遣還原籍為民原保官吏治罪

太祖時張中善數學以鄧愈薦召之從征陳友諒舟  
次孤山無風不得進中以洞元法祭之風大作遂達  
鄱陽成祖時金忠善易卜與靖難功厯官兵部尚書  
皇甫仲和精天文推步學授欽天監正而袁珙善相

人術受知蕃邸及帝即位拜太常寺丞子忠徹亦傳  
父業英宗天順初替者全寅善京房術帝復辟寅有  
力焉授以官不受至以方術得幸者憲宗時則有僧  
繼曉鄧常恩李孜省趙玉芝世宗時則有邵元節陶  
仲文之類

凡醫士俱以世業子弟試補或令在外訪保以充

初置醫學提舉司後改太醫院凡習業分十三科自  
御醫以下與醫士醫生各專一科凡醫士俱以父祖

世業代補或令在外訪保醫官醫士以充孝宗弘治  
五年命選醫家子弟推堪任教師者二三人教之每  
季考試三年或五年堂上官一員同醫官二員試其  
通曉本科者收充醫士未通曉者許習學一年再試  
三試不中者黜之若五年考試成材者多其教師亦  
量加升授各府州縣醫學官生提舉官按時考核遇  
太醫院醫士醫生及本處醫官有缺保送選用其徵  
至京者禮部會同考試高等入御藥房次入太醫院

下者遣還

時以醫舉者惠帝時戴思恭成祖時盛寅吳訥孝宗  
時吳傑世宗時許紳慶厯間李時珍思恭寅傑並官  
太醫院使訥有學行嘗侍內廷備顧問歷官南京副  
都御史紳累加禮部尚書領太醫院事宮變營救甚  
力加太子太保時珍官楚王府奉祠正

又成祖時安南黎澄子叔林並善造神鎗澄官尚  
書叔林官侍郎而以能書舉者尤衆如太祖時周淵

袁復成祖時金問宣宗時凌晏如張天駿沈度度弟  
彛英宗時陳學景帝時趙榮世宗時張電談相等皆  
厯位通顯至景帝時陸祥以石工蒯祥以木工世宗  
時徐杲亦以木工累擢至工部侍郎尚書時稱為匠

官

欽定續文獻通考卷四十二

欽定四庫全書

欽定續文獻通考卷四十三

選舉考

賫選

宋寧宗嘉定十年十二月以軍興募民納粟補官

十六年十二月命淮東西總領及沿江被水州募江西  
湖南民入米補官

理宗端平元年詔應薦奏人當紹定六年以後入賫補



官者令別換授

淳祐六年七月泉州歲饑其民謝應瑞非因有司勸分  
自出私鈔四十餘萬糶米以賑鄉井所全活甚衆詔補  
進義校尉

七年詔賞浙東西福建路官士之家濟糶者補轉官資  
有差

恭帝德祐元年五月饒信州饑令民入粟補官

遼道宗大安四年立入粟補官法

金熙宗皇統三年三月陝西旱饑詔許富民入粟納官  
世宗大定元年以兵興歲歉下令聽民進納補官又募  
能濟饑民者視其人數為補官格

尚書省又奏正隆軍興之際進錢粟者亦宜量授以  
官從之二年正月行納粟補官法

五年二月以邊鄙寧息罷納粟補官法

章宗明昌二年八月勅山東河北闕食之地納粟補官  
有差

承安二年四月令人入粟補官

宣宗貞祐二年三月詔許諸人納粟買官

是年又定權宜鬻恩例許諸人進官升職丁憂人許  
應舉求仕監戶許從良入粟草各有數從知大興府  
事胥鼎請也

金史循吏傳曰貞祐二年拜孫德淵工部尚書攝  
御史中丞時山東乏兵食有司請鬻恩例舉人居  
喪者亦許納錢就試德淵奏此大傷名教事遂寢

按是時金之國勢日蹙財窮力殫計無所出賣官鬻爵有所不諱故直名其例曰鬻恩即丁憂人亦許之入貲以應舉求仕至元光二年正月謂宰臣曰鬻爵恩例有丁憂官得起復者是教人以不孝也何為著此令哉然則宣宗已自悔之矣

三年正月更定軍士入粟補官格

尚書省言內外軍人入粟補官者多行伍寢虛請俟平定應監差者與三酬門戶有職事者升一等其子

弟應廕者罷之帝可其奏

三月勅尚書省入粟補官者毋括其戶為軍

九月定勸率遷授格以濟軍儲

凡官民能勸率諸人納米百五十石遷官一階正班  
任使七百石兩階除諸司千石三階除丞簿過此數  
則請於朝廷議賞推司縣官能勸二千石遷一階三  
千石兩階又定制司縣官能勸率進糧至五千石以  
上者減一資考萬石以上遷一官減二資考三萬石

以上遷一官升一等皆注見闕

四年七月詔河南陝西鎮防軍應廕及納粟補官者供役如舊候事定乃聽赴銓

時河東行省胥鼎又言河東兵多民少倉空歲饑竊

見潞州元帥府驚爵恩例條目寡少未盡勸率之術

今擬凡補買正班依格止廕一名若願輸許增廕一

名職官願納粟或不願給俸廩券糧者宜量數選加

三舉終場人年五十以上四舉年四十五以上並許

入粟該恩大小司及承應人令譯史吏員雖未繫班亦許進納遷官其有品官應注諸司者聽納物借注丞簿丞簿注縣令差使免一差掌軍官能自備芻糧者依職官例遷官八月三原縣僧廣惠又進僧道納粟多寡與都副威儀及監寺等格命從其言鬻之

興定元年正月頒給東平路吏民應獲誥勅令輸物以濟兵食

東平行省言調兵以來吏卒因勞進爵多至五品例

獲封贈及民年七十並該覃恩若人往自陳公私俱  
費請令本路為製誥勅類赴朝廷印署使受命者量  
輸諸物而給之人力不勞兵食稍濟從之又潞州行  
元帥府事粘割貞言近承奏格凡去歲覃恩之官以  
品從差等聽其入粟委帥府書空名宣勅授之則人  
無陳訴之勞而官有儲蓄矣比年屢降覃恩凡羈縻  
軍職者多未暇授若止許遷新覃則將隔越矣乞令  
計前後所該輸粟積遷詔亦從之至二年二月諭尚



書省曰聞中都納粟官多為吏部繳駁殊不思方闕  
乏時利害為如何其諭之勿復若是

哀宗天興元年八月賣官及許買進士第

元世祖至元二十五年三月以松江民曹孟炎歲輸米  
萬石助官遙授浙東宣慰副使

成宗大德十一年

時武宗  
已即位

七月江浙湖廣江西河南兩

淮屬郡饑詔民能以私粟賑貸者量授以官

泰定帝泰定二年九月以郡縣饑募民入粟補官

二千石從七品千石正八品五百石從八品三百石  
正九品不願仕者旌其門

文宗天曆二年四月陝西諸路饑行省請令富民納粟  
補官從之

次年二月命江南萬石者官正七品陝西千五百石  
河南二千石江南五千石者從七品其餘品級有差  
四川富民有能輸粟江陵者視河南例其不願仕乞  
封父母者聽至九月罷

至順二年五月益都路宋德讓趙仁各輸米三百石賑膠州饑民九十戶詔依輸粟補官例予官

順帝至正四年十一月各郡縣饑令民入粟補官以備賑濟

時有匿奸事而輸粟得七品雜流者為怨家所告有司議輸粟例無有過不予之文中書省司郎中成遵以為賣官鬻爵已非令典况又賣與奸淫之人其何以為治必奪其勅還其粟著為令乃可從之

十二年三月從中書省臣言行納粟補官之令

凡各處士庶能自備芻糧供給軍儲者照依定擬地方即授常選流官依例升轉封廕其已除茶鹽錢穀官能如例再納者驗見授品級改授常流

陶宗儀輟耕錄曰至正乙未春中書省臣奏遣兵部員外郎劉謙至江南募民補路府州司縣官自五品至九品入粟有差人無願之者既而抵松江知府崔思誠曲承使命不問民有粟與否拘集屬

縣巨室黜科十二名衆皆號泣求免弗之顧輒施  
拷掠抑使承伏即填空名告身授之惟平江路達  
嚕噶齊力爭以為不可竟無一人應募者崔聞之  
深自悔報

明景帝景泰元年正月始令輸納補官給冠帶

時以大同宣府馬草不敷令聽選官及承差有能輸  
草千五百束辦事官輸二千束即予選用應降者加  
輸千五百束復其原職當該吏輸千五百粟辦事吏

輸二千束給與冠帶以次選用應重歷者加輸五百  
束亦給以冠帶八月以山西代州糧缺募民能自出  
已資赴臨清官倉運米三百石至代州者給以冠帶  
仍詔在京辦事官吏承差比軍民加一百石吏部聽  
選官并在京當該吏典及官應降等吏應重歷者加  
五十石俱自臨清運至代州辦事聽選官承差不拘  
資次除授官降等者復其職其當該吏不待實撥考  
覆給予冠帶應重歷者亦給冠帶辦事滿日依例出

身俟事平日停止二年正月又令軍民輸納者世襲武職都給事中金達疏諫不聽四年戶部以邊儲不足請令罷退官非贓罪者輸米二十石給誥勅都給事中劉煒言考退之官多有罷軟酷虐荒溺酒色廉恥不立者非止贓罪也賜之誥勅以何為辭若但褒其納粟則是朝廷誥勅止直米二十石何以示天下後世此由戶部尚書金濂不識大體有此謬舉帝為立已之憲宗成化二年以湖廣兵興歲饑陝西榆林

神木各處糧草不繼定官吏納米免考復職等例六年正月陝西巡撫馬文升言榆林寧夏諸營芻糧缺乏請令陝西考滿官納草五百束免其赴京給由其山西河南陰陽醫學僧道官納豆百石徑送吏部選用從之繼以預備倉儲詔凡一應聽考吏典納米五十石免其考試給冠帶辦事在外兩考起送到部未經分撥者納米一百石在京見辦事一年以下納米八十石二年以下六十石三年以下五十石免其考



試就便實撥當該滿日並給與冠帶各以資格以次  
選用在在外軍民願充吏者納米六十石定撥原告衙  
門遇缺收參又詔鳳陽淮安揚州三府軍民舍餘人  
等納米二百石授正九品散官二百五十石正八品  
三百石正七品九年詔直隸保定等府州縣兩考役  
滿吏典納米一百石起送吏部免其辦事考試就撥  
京考二百五十石免其京考冠帶辦事一百七十石  
即於本府撥補三考滿日送部免考冠帶辦事俱以

次選用其一考三個月以內無缺者納米八十石許  
於在外奏歷兩考

四年四月始令生員納粟為國子生

山東臨清縣學生員王銘等願輸米八百石乞入監  
讀書從之開封教授黃鑿上言納粟拜官衰世有之  
然未聞納粟貢士者也今以浮薄不教之子納粟進  
身不數年寄以民社是猶驅狼虎以牧羣羊欲其不  
恣啖噬得乎章下戶部議不從尋以禮部尚書胡濙

言罷之至憲宗成化二年二月南京兵部尚書李賓  
等奏令官民子弟納粟送監讀書以助賑濟禮部尚  
書姚夔疏言國子監乃育才之地朝廷資以致治近  
因各處起送四十歲并納草納馬生員動以萬計已  
不勝其濫今又行此將使天下以貨為賢士風日趨  
於陋尚望其有裨治理哉宜別為處置帝曰祖宗設  
太學教育人材非由科貢者不得濫送今賓等欲令  
官民子弟出錢穀賑民補太學生古無此例且天下

財賦所出其途孔多學校豈出錢穀之所禮部議是其勿許然其後或遇歲荒或因邊警或大興工作又率援往例行之訖不能止

孝宗弘治五年十一月停納粟例

吏部尚書王恕言永樂宣德正統間天下亦有災傷各邊亦有軍餉當時無捐粟例糧不聞不足軍民不聞困弊比年來一遇災歉輒行捐例則人既以財進身欲其砥廉隅為循吏豈可得也帝即命止之

世宗嘉靖八年以備荒立勸納法

詔撫按官曉諭積糧之家量其所積多寡以禮勸借  
若有仗義進納者酌給冠帶正七品至正九品散官  
多者仍官為立坊以旌尚義四十三年四月戶部以  
薊鎮新餉不充請凡歲貢監生選期未及預授光祿  
寺監事上林苑鴻臚寺署丞序班京衛經歷在外都  
布按三司經歷斷事理問都事照磨檢校等官其吏  
員出身從七品至從九品令各納銀有差從之四十

五年六月詔以邊餉不足再行開納事例三年神宗  
萬厯二十二年三月三邊總督葉夢熊以固鎮糧餉  
匱乏請照例開納以備軍需至明年十二月止從之  
二十四年三月乾清坤寧二宮災四月工部以鼎建  
工費浩繁奏請開納詔下所司議行五月吏部奏東  
事告急請募吏民納銀出身有差從之二十七年閏  
四月戶部請廣開納以濟邊餉凡府運佐及州縣正  
官為考察叅論罷斥者復級進階其各處軍民人等

劄給品官戶科給事中李應策疏言其不便於是改  
議請凡州縣運判等官查係致仕非劾斥為民者方  
許納貲進階各處軍民子弟身家果無違犯量所納  
給以文武告身報可

王圻曰國初祇以徵聘薦舉賢良孝廉明經儒士  
入官已而開歲貢之例重舉人進士之選而以貲  
發身所未覩也雖洪武中有稅戶人材之擢然祇  
取其富厚醇樸而非計其貲也景泰中始以邊費

令民納粟納馬而貨選蓋權輿矣繼是而納級又繼是而究運此道益濫觴焉

神宗萬曆三十年二月罷國學納貢例

從南京祭酒郭正域請也先是祭酒孫應鰲于四年四月疏言太學非舉貢及勲胄恩廕不入自景泰初年邊儲匱極始議開納然止以生員廩增附為差亦時開時輟至隆慶間遂令停廩降增及降附發社並黜退者皆得納銀入監矣提學憲條何以行于儒生



乎提學所擯斥盡可歸諸太學則太學毋乃為提學  
藏垢納汙之藪歟至于民間俊秀子弟原令赴提學  
告准附學名目故謂之新附與兩京見任官隨任子  
弟未入學者并納銀入監亦隆慶以來覆定事例也  
此例一開而商賈與臺隸役咸廁其中甚有身未成  
童一丁不識者皆驟躡賢關他日服官為民蠹賊不  
問可知矣亟宜停止允之至是猶有以納貢入監者  
故正域請罷其例至愍帝崇禎五年正月諭戶工二

部曰朝廷分職設官原以任賢用能非可別開倖濫其典制所載納粟輸貲並與選授止為科目正途之外未盡乏才因此鼓舞俊秀招徠急公立法未嘗不善乃十餘年來軍務煩興羣議足餉計臣屢經條奏事件從此頻開雖俯從士民好義之心稍助國家師徒之費然而一時偶屬權宜事久必滋弊蠹吏途紛雜名器混淆有貲即可博官才品俱在勿論甚而儼然民牧培克取償階厲尤為不堪朕方欲慎稽流

品撫恤痼瘼而開納不除則源之不清流何能潔爾  
戶工二部從今為始將近年新開各樣事例盡行停  
止其以前曾經納過者准與照例序選此後不得再  
行援例仍將議停款目開列明白奏請裁定傳示吏  
部遵守不許朦朧影借致滋銓弊及援納既停監生  
漸少於是議開選貢以充國學旋以奔競者多行之  
一次而罷仍開事例如故

王圻曰按貨選入官昉於西漢謂任富可不貪也

厥後邊費不足輸選成俗雖張釋之黃霸卜式司馬相如咸由是出不以為諱然終西漢之世得人四五而已唐宋以來亦間行之大抵由軍興頓匱非獲已也我朝宣德以前科貢之途入太學者猶須精擇戒其庸濫至於景泰始以邊境多虞開生員納粟納馬入監之例然是時多不過八九百人已而吏部尚書王直禮部郎中章綸咸以為言禮部侍郎姚夔議覆遂尼不行成化初復開納糧納

草納馬之例未久而止二十年山陝大饑民相食  
大臣以救荒無策不得已又令納粟入監限年餘  
即止時入監者已至六七千人於是令入監者過  
兩月則放依親有願自備薪米寄監讀書者聽尋  
又念納粟監生年二十四以下願坐監者自備薪  
米寄監讀書扣年二十五歲以上方准食糧收撥  
二十二年令納銀米監生到監兩月放回原籍收  
充增廣生員年二十以下者八年二十以上者五

年滿日咨取入監復班序撥正德以後或以賑濟  
或以防禦或以傳奉開上粟入監之例於是納銀  
之途益廣矣世宗入繼大統詔嚴止之嘉靖四年  
又復暫開然須提學官考其能通文義者兩京十  
三省限不過五千人時各王府典膳引禮等官青  
衣社學生亦皆得援例入監近年太僕缺馬戶部  
缺邊費乃開例益濫遂至市井恒人皆得藉俊秀  
名目輸粟入監注選銓部者至數萬人歷考先朝

雖不獲已而行此例然必各提學官試其文理通者而後許之又各地方俱限以名數又年二十五以下者雖寄監不得食糧收撥近時此例俱未申明其間英俊由此而擢名科策表樹勲猷夫豈無人然千百而十一耳

欽定續文獻通考卷四十三